

# FLOREAN DAL PALAZZ

— Al salte fur la Joibe —

(in fio ch' al vara fiat)

Ogni doi numars 5 centesins l'un — bez subit

Si vendin la vie da l'Edicola e la dai Tabachins in Marciavieri, in piazza Contareno e in Borg di S. Bartolomeo

REDAZION: su la fontane di piazza Contareno — AMINISTRAZION: su la fereade de Vigne

Per altri Florean al ai lassara ciata, quand che covente, in Stamparie Jacobi e Colmagne.

Tiradure 5,000 coplis.

## Florean par Puscuell.

Cognossêso il President di Puscuell?

O crod che sedin pòs a Udin che no lu cognossin Ben, o soi stat che altre di a bevi une tazze la vie dal President che mi fase mill complimenz e nol voleve mai lassami là vie. E jerin diviars di lor a bevi e podei sinti ch'est discors:

— Gioh, bou omp, seso cussì indaur di là a spindi bez daur de Maghe?

— Ce oleso fa, o vevi la vace malade, o hai provat di dutt, ma no mi zovave nuje. Mi han ditt che par salvale e podeve jessi nome la Maghe. E jo o soi stat a consultale.

— Contaimi, contaimi, come che jè stade?

— Eco, o soi làt là, i hai contade la storie. E cheste siore mi disè che i volevin cinq francs. Jo on vevi nòme quatri e i hai ditt che cioless chei. Nò, e disè la Maghe, se no son cinq, no fasìn nuje. Alore o soi làt a fami imprestà un franc e i al hai puartat. — E ves di fà in cheste maniere. E cioless de semule e fais un bevarun che i darès e vace, nel timp instess i meteis siett fuels di uliv tes orelias.

A chest pont dugg chei che jerin in te ostarie si meterin a bacana come mezza.

— Ben, ise, uaride po' la vace?

— Ah no sior, magari, e jè muarte!

— Veso vidut mo, pua omp, se chei bez no forin butaz vie?

— Ma cumò a jè fate e chell che al è stat, al è stat.

Alore al vignl fur il President di Puscuell a discori.

— Ch'al stiuti, sior Florean, al mi disè, lui al crod che la Maghe no fasi bogns afars ancemò. Al s'ingiane Ance za dis une puare femine di sott Palme e jere stade là vie de Maghe par fassi uari di un mal in t' une giambe. Ma la massarie e disè che la Maghe no jere a ciase. Po dula ise lade, i domandà la femine. E jè lade a fa i esams a Padue, e rispuindè che perle di massarie che ai fas magnitizza. Ce razze po' di esams che vedi di fà, jo, al continuà il President, no sai par die.

E dugg e continuavin a ridi tant che podevin. Jo besol o stevi immusonat, serio, e pensavi, a la stupidagine da la int che no ul capile di no fassi mangià i carantans da lis canals. Jo o hai fatt plui dal miò dovè scrivind cuintri cheste intè, parchè che o crod che sedi ore di finile cun ch'estis briconadis. E par di là veretat il miò sfuei al è lett par dutt, a Udin e fur, ma ancemò no le han ben capide. Se son cussì mamos, jo po' no sai propit ce fai e cui che al è cause dal so mal che s'al gioidi.

## Florean al Redentor

Al è inutil, lis Ancelis dal Redentor e son la me passion; e, cun dutt ch' o hai pore che il plevan al puedi metisi in zilusie, no soi bon di fà di mancui di tigoli daur a di ches benedetis. Ce oleso! e jè una debolezze, ma, za e viodis che dugg si ha lis sos. Vigi Gabriell pe pantianate e... par pualchidun altri; 'l Apuestul Pauli pe busate des ôdulis; 'l inzegnir Momi pal cement, (cun dutt che cumò i cole la croste, dula oh' al hà olut metilu a fà fente di sei piere, te gnove cornis dal palazzo degli stu... di...) e cussal jo pes Ancelis. E po' i jentre Vitorie; cul diaul! no oleso ch' o i tindi a di che bieles pivele che, co ciupe in man il standard dal boton, e fàs movi il cur e l' anime a di chiunque, par flap cristian ch' al sedi?

Dunce, lassait che us conti. Il plevan al ha divi-dude la sozietat des Ancelis in doa compagnis. Lis Ancelis verdis e lis Ancelis rossis. Lis verdis e son lis plui zoveninis, ches che non son an-cimò iniziadis in dugg i misteris e in dutis lis praticis de sante sozietat. E son dunce una spezie di compagne de speranza second lui, che al apera di tiralis su, come ch' u va, second lis sos santis intenzions. Lis rossis po', e son par lui la compagne dal amor, di Dio ben intindut; e par ches a no son plui misteris, e lis praticis il plevan i es insegue dutis; è l'or, una a di-spiett da l' altre, e van matis par imparà e par contentalu in dutt e par dutt.

Fur de puarte di S. Lazar po', in t' une ciase di predis, dula ch' al ha tratt il folo une volte, in tal curtil, si riunissin la sere Ancelis e plevan

a zujà. E zuein cul sgurli; e bisugne viodi il plevan, ce brav ch' al è di fàtu sgurli e di fà-jai petà tes giambis di ches polzetis! E tal ultim, par fin la giostre e si ciapin dütis pe man e, cul plevan tal miezz, si tachin a balà, ciandand:

« Bossolo, bossolo, tondo!  
« Quanti bezz in questo mondo!  
« La panada senza sale....

ma senze sal si po', pardiane! anco mitind che panade an sei in ciartis cocis.

## Florea in Sacristie.

Mi son rivadis ce sao jo' ce tantis letaris di S. Denel e di Tresesin sul cont di chell benedetti di Pre Teston. Une po' mi ha fatt propri ridi, perchè che mi contave che al ha mandat a l'Espu-sizion chell par di scalfarozz, peaz cul spali, ch'al ha puartat fintenemai che altre di. Mi pararess che dopo, generos come ch'al è, al dovaress po' ben po' regalajai a puar Florea che, discolz come ch'al è, al patiss tang polezz di unviar. — Un'altra letare a mi conte lis impresie ch'al veve, sott i tognos, di cioli pal cul i talians. O mi visi anco jo' ch'al tignive catedre, dute la mari dal di, al Cafè Corazza cun Bastian Gerardi, Filipp Vide e Bepo Crucifiss. Eh! in ta che volte, al jere un ditator lui al Cafè Corazza. Dal rest, no baste lis letaris, ma ond' hai sintudis jo' cu lis mes orelis tantis di bielis. Sta cujett anco tu, Pre Teston! come la tabachine, che par uè no hai vonde ciarte, ma par uè vott o hai biell za riservat un bocon di sfuei par te. A riviodisi.

## Florea a Felett.

In domenie, crodind ch'a vess di sei la inau-gurazion da l'aghe, o soi lät a Felett. Ma, par aghe, nuje; e jere invece la sagre e la purcission. Jo, us dis la veretat, o soi restat stomeat a viodi il decoro e la devozion di che funzion. I contadins e ucavin come mostros, senze capi une malan-drete nuje di chell che sberlavin; e lis Gefinis i tignivin daur ma no podevin sta plui te piell, no viodevin l'ore di là a menà lis giambis a l'ostarie dal Cavalin. Insumis, dula isal il Volere è potere di chell sior Sindich, s'al lasse che si fasin ciartis pipinotadis?

## Florea a Vile di Var

Bielis lis elezions a Vile di Var! Protagonist. Toni, pari dai puars; Tin potente, che par su-stigni Toni e se stess, al ha fatt vigni jù da Udin so fradi Agui de confraternite dal santissin sacrament; un avocat che, visabai dai bogna fruzzons mangiaz in canoniche, al è vignut a fa un att di ricognossinze al pari dai puars, pes ciarezis fatis a lis gnezzis; un famos ciazzador, che al veve di fa une fruzze di dugg i jeure, ma, puairet, al piarde il sivilott e i bracos; i son staz vie di e gnott, i jeurs e ciampagn e on la pulize la becarin, e cussì a loca come al

cian di Vignut In chest chatabui, puar Checutt, salvat de sojpetade mal molade, al ripuarta in compens dugg i voz dai contribuenz. Toni po', pari dai puars, a mi disin ch' al continuara a di-rezi la barachie dal comun....

« E la baracca così cammina »

cun chell ch'al ven dopo. Ma bielis lis elezions di Vile di Var! si po', bielis!

## Corispondenze di Florea.

Palme, ai 24 di Loj.

Ohe! cemut isè, Florea, che no tu ti visis di Palme? Sastu ch'an d'è di bielinis anco chenzit pal to stimatissin sfuei! Pardiane! s'o ti contass dutt joia, ma cumò no hai timp, vièstu; perchè ch'o devi là a fevelà cui agenz eletoral: Fiche, Rochett, Cechin e altris galopios, pajaz par che vadin pes ostariis a di lis virtutz dai candidaz conseirs di domenie. Sastu cui che son i quatri propos? Sint mo:

Il prin 'l è chell che sior al par,  
Il second 'l è Bepo stalfir,  
Il tiaz 'l è nason cuardar,  
Il quart sior Pieri ustir.

Ce bieles scielte nomo?... Ustu savè cui ch'a le ha fate?... Cognossistu tu chell bocon di oinp che ti somèe, cule sole diferenze che lui al si mov e ch'al ha karantans?... Ben, spiete; lui, chell altri cucc napolitan, capitat cul cul tabarin, cul sivilott te sachete, e; se no fali, cu lis scarpis di cuarde, ma, ciart, dutt sbregat, e chell famos democratic cul servitor in livrée, son staz lor tre che ju han scielzuz fur. Ma bisugne savè il paroe anco che han fate cheste scielte. Tu sas che i Municipis in zornade e scugnin sflocia par decoro e fa debiz par che vebin ce pajà i nevoz; dunce, tu capissis, che in tal Municipi al ul un che al sepi fa dai bogna tacous. Se ti capite cà il Prefett o qualche altri personagio cui ciavai, noustu che il consè al vebi il so stalfir! Se qualche consèir al ul picciassi, o anco fa picia qualche contribuent, varessial di mancià in consèi cui che 'l vendi cuarde? E se pal avignil il Mu-nicipi al vess di dà un banchett a qualche de-putat o senator, no covential oal vebi cui che s'intind di vin e di polezz? Jo ti garantiss che i quatri scielzuz a saltin fur dugg consèirs do-menie a plens voz. E po' Leon, mitind il det sott la palme de man e fasinku sgurli, al ha biell zà ditt: « Jo o hai dugg i Palmarsin ca sott! » Buff! O soi fermat a ciachara masse... mandi, mandi, ciao! Ocatt.

Glemone, ai 24 di Loj.

Noata a ridi! Un frutt, no un cian capissistu, un frutt al ha muardut un frutt. Ebb, subit in boje, ordin sever di metli la musarele al cians, anco a chei on la barba e che sott fis di siors. E jà una bieles ciosse, ma, si scugnibl viodi sang prime? — Un altri biell ordin al dia che i pòzzi

neri no püedin jessi nè plui grang, nè plui piz-  
zui dal numär dai menbros componenz la famèa.  
E nance chest nol saress vignut fur se nol colave  
t' une vaschè un di chei de Cumission che leve  
in zir. Cui di plui po', no si pò svuedà la ma-  
terie sprafumade, nome oun d' une machigne e  
di' gnott. Cumò duncè, se la femine mi fäs un  
frutt, o scugnäräi slargià la fnesse; e s'al mi  
mür, strènzile. — Ouff! Ce odor di colèra tes  
sachetis! Vait a vacinassi! — Al è di bon che  
son avis che durin tre dis; se no, us imprestarai,  
par qualche zornade, che probosseide insenapàde  
che zire pai ciantons de classe municipal.

**San Cristoful.**

**Cividat, ai 24 di Luj.**

*Parturien montes nascetur ridiculus mus* e che-  
ste volte il *mus* al è propit chei batociatt che al  
si divertiss di scriviti cu la firme di *Sandri Eh*,  
Sandri si! Sandri al è un omp che nol bute vie  
i sjei carantans par fassi scrivi quatri fotis e  
mandalis cu l' intenzion di passà par leterat. Ma  
a proposit di cozzis! Cemut hastu fatt la cognos-  
sinze di cheste cozze? O sai che ti plasìn, ma  
o oròdevi che tu ti contentassis di distrui la  
robe nostrane; almanco cussì tu disevis in ta  
che zornade che tal mostrai che al balave cu  
la mame, parcè che nol podeve balà cu la fie,  
dopo, ben intindut, di ve fatt balà la spēche. O  
hai scomenzat cul latin e ho uei ançe finì. *De*  
*minimis non curat praetor*, e cul pretor no si  
scherze: (Si, domande a Coccapieller!) Duncè, a  
non miò, mande chell amigo tal so país, che là  
cul *tre fia undis* si ciapin i... ternos al lott.

**Caporal.**

## Da la zae di Florean.

Mi han mandat une copie autentiche di une  
letare di Scurdilli, scrite zà dis di Pole, a di un  
so ami da Udin. La publicarai jobe vott parcè  
che uè, no hai puest.

Stant che o hai tante materia, che no sai di  
ce bande voltami, cussì o scugni mandà a joibe  
vott la publicazion di ches storielis che o hai  
promitù, tal numar passat. (Tabachine sta cujetel)

O hai savùt che lis sartoris e son stufis fin  
parsoe i voi di viodi a spassizà par Marciatvieri,  
chei doi bocognazz di mari e fie, (massime po'  
la mari, une barce a diriture,) che cu la lor  
code, di un piezz in cà fur di mode, a fasin in-  
zopedà dugg chei che passin e se, par disgrazie,  
e son sott i puartis, bisugne là a ciapà la volte  
se si al passà. Folc lis folli i al li zardin nome  
par lor dös. E van vie po' ein t' une ande e  
oun t' un pofarbio ch' al par che, sedin paronis  
dal mond intir, massimamentri cumò che han

mitude su la scoce. Za si sà dutt par dale a  
d' intindi; ma al è plui fuh che rost. Ben se  
m' al dfin a mi!!!

In une ostarie, ogni sere a jè une reunion  
di mieze dozene di vecios bavòs: (e i jentre ançe  
che buine lane di *Franzel*, chell ch' al è bon pal  
zuss,) e là, capto, scomenzand des vott e finind  
es undis in pont, no fasin altri che sorà a plui  
non posso dugg i aventors. Bisugne po' notà  
che par zonte, prime de ritirade, e fasin il so  
matt discorrutt sul costum adamitich de femine,  
tirand fur di ogni sorte di porcariis. E di che il  
plui zovin al conte setante carnevai su la gobel  
Oh monadis! Ce, us parial mo'? E ce razze di  
zovenuzz! Urce, vergognosazz!!

E son un pòs di dis cùl che si viod a zira  
doi soldaduzz, un massime pitinìn, pitinìn, che  
han la smanie di cambiassi di vistit uns dis o  
dodis voltis in di. Cumò e son vistuz in munture,  
dibott ti saltin fur vistuz di omps, e vie cheste  
vite dute la mari de zornade, fassie lunge! Ciò,  
puarez! a no han altri ce fà. Quand po' che jè  
la musiche, si ju viod là come pretors, contor-  
nàz di quindis, ving souelars, che i fasin mël com-  
plimenz, come che fossin tang generai; masse  
ce fà! e po' su e jù discorind per talgiano, e cu  
la code dal voli simpri in moto, par viodi se a  
di nissun i dā tal voli che biele munture; e  
magari che i sberlassin par daur: Oh! ciale, ciale  
ce biell soldadutt!!

E son unimong di lor che pretindin che nome  
di gnott la int e fas l' amor. Jo o puess di che  
dutis lis oris e son buinis. Par esempi e jè une  
biondute, maridade, che si lasse ciatà ogni ma-  
tine cu la sporte par là a cioli di gustà in t' un  
Cafè, dulà che fäs conversazion cul so moròs. E  
intant il puar marit ch' al si sfadii a fà la barbe!  
Puar diaul!

Gnav sisteme di fassi pajà. In Puscuell, in  
t' une buteghe di pomis e di aghe di vite (il paron  
si clame Belò, ma biell!) al è mitut sul balcon  
un cartell dulà che si lej:

*Il signor.... è invitato di pagare Lire 3,68 per  
pane, frutta ed altri generi somministrati.*

Ce us parial di chest sisteme Belò? No isal  
mo biell?

Mi scrivin che l' asar, che o hai contat joibe  
stade sun chell secondin che al veve di comprà  
la medae da l' Unitat, nol sedì in chei tiarmins.  
Anzi il vecio militar nol varess mangiat nuje al  
secondin, e si vareas tratat nome di une cene in  
amicizie. Se jè cussì, nuje di mior...

L' Economo di Sant Iacum al è sord. Par altri

no son migo no sords dugg i parochians che sberlin, cuntri di lui, arcè che al permett che scomenzin a sunà lis ciampanis es tre di matine e no la finissin fintenemai a miezdì. No capissial chell sior Economo che a di che ore la int e ha voe di durmì? E se nol capiss lui, no podaressino capì il Municipi e la Questure che i citadins e han diritt di sta cujezz par podè lavorà tai indoman?

Muini di Sant Iacum procure anca tu di sta cujett. Impareade tabachine!

Une corrispondenze di S. Vit di joibe stade e voleve savè cemud che jere lade a finì la quistion di Cope-d'aur cun chell Nardon tutor dai erèz Magro. Eco ce che o hai podut savè di positiv. Al è stat anulat il pignorament, parò che tal verbal no jè stade declarade la qualitat dai mobii impignoraz e parò che fo mitude depositarie la pupile Magro di quindis agn. 'L Esator al fo condat a pajà i dans e lis spesis. Cumò po' Nardon al fàs la petizion al Esator. Se dugg fasessinucuss, Cope-d'aur un pòc a la volte al deventarèss pizzul.

Martars, dopo di gustat, un di chei cariolons che van a supà sù la grasse di cristian, al si ributta cà in piazze. Contarene, propit denant di miò copari Vinturin, e al molà fur dutt, fintenemai l'ultime gote di chell ch' al veve te panze. Figuraisi Vinturin senze fazzolett di nas, puar cian! Pòc i mancià che no i vigniss imbast. Bon che in chell al passà il Dotor Comell, che i dè coragio, disingi che che jere une gnove misure igieniche, adotade dal Municipi par tignì indaur il colera.

E han menat il Leon dutt invulzzat tai pezzoss; no sai po' se par che nol ciapi un raffredor, o ben par che nol vedi di viodi in muse ciarte int. O orod veramentri che la rason juste e sei la seconde. Co lu varan tirat sù su la so colone al sarà tant in alt che nol podarà cognossi lis personis. Ma fintenemai che nol è lassù, s'a no l'essin taponaz i voi, ciarz galanzumin no varassin podut passà par piazze. Contarene, se no il Leon, a viodi ches musis di falne, i sarass saltat adress. Cio! prudenzie i ul!

Pantianate! pantianate! Tu ses stade buine di fàti incaricà, dal Comitad de Espusizion, di meti a puest dugg i lavors feminii che saran presentaz. Viod ben ch'a je une mansion unmont delicate che che ti è tociade, e che Florean al starà ben atent, par viodi che no tu 'n fasis des tos solitis. No sta a crodi che i tiei protetors a puedin salvati de me lengate se tu fasis nuje nuje oh' al mertì di sei tarizat.

In t' une ciase che scomenze in Puscuell e va a finì in borg di Viole, l'ultime androne, il paron al ten a planteren, quatri puroizz, dos vaiois, dos ciavris, dos ploris, gialinis a slavin, ledan, dutis lis porcaris, in mud che di chell lug e ven fur une spuzze che oui che passe al ris-ce di colà daur cope. E chei puars vicinanz! In chest oiald ch' al è cumò e cul colera in viste, us dis jo che son ben servis. E la Cumission sanitarie ce fasie?

Al è un mangieciartis di Grizzan, che no si se se al sedi stabil o mobil, che al prove qualchi brutt quart d'ore. Sintit cheste. Al fasè i azz a di un puar diaulatt fin al pignorament, e no manciave che di mandà a l'aste chei quatri pezzoss. Il mangieciartis al va là vie di ciase dal debitor e al scomenze a dli che se nol pae, lui in base al articul 465 dal Codiz, i puarte vie anca subit i mobii.

Il debitor, che e podes crodi al jere mal montat, al sberla alore: E jo in base all'articul 466 lu mandi fur dai... totul. E cusà disind al scomenzà a sunà patass e scopulis che nol finive pluì. E ce qualitat di articul dal Codiz! A la large!

Ju impiegaz dal dazi e si lagnin dal orari (des tre e tre quarz di matine in fin lis vott de sere). Veramentri non han quart di lagnassi. Sior Daulo, che si movi a compassion di chei puarezz!

## SERVIZI TELEGRAFICI PARTICOLAR di FLOREAN.

Cividat, 25 (ore di mangià la garbe). Sabide matine rivarin dis barelis di cucc per confuarta il lor bon President, Dottor Uziell — Forin incuntri il caporal, bati-strade, Orsutt senze ciaf tignut par man di Meni Scarante; e une adrumie di birichins sott il comand di Tite matt — Il riceviment al ve lug te stale de Uanine — Meni Scarante al fasè ju onora di ciase: Grand tratament di semule e stram e rinfresch in te porze dal Marolat. Orsutt lu insacarin di snisel e Uziell al dè drentri in tai vanzums dal giatt.

A miezdì si tentà l'operazion in te sale dal Consei. Il protomiedi di Mersin al rompè i fiars in tes radris de cuarnadure pronosticate. Il mago di Vernas al proponè lis bottis di lug e une raspade sott il battifiar. La mozion fu acetade. Si spiete ansios esit. Madone racomandà di fa prest, parò ch'a jè stufo. Nol è bon di nuje, nome di sporoià.

GUIDO ANTONIOLI, gerent responsabil.

Udin, Stamparie Jacobi e Colmegue.